



**Sud Bosne i Hercegovine**  
**Суд Босне и Херцеговине**

---

Broj; S1 3 Iž 039622 21 Iž  
Sarajevo; 26.01.2021.godine

Sud Bosne i Hercegovine, u apelacionom vijeću sastavljenom od sudija Vesne Trifunović kao predsjednika vijeća, Zvezdane Antonović i dr Branka Moraita kao članova vijeća, odlučujući o žalbi Partija demokratskog progres-PDP Opštinski odbor Doboju koju zastupa Slobodan Vasiljević, izjavljene na odluku Centralne izborne komisije Bosne i Hercegovine broj: 05-1-07-1-96/21 od 21.01.2021.godine, o poništavanju izbora održanih 15.11.2020.godine na 89 redovnih biračkih mjesta u izornoj jedinici Doboju, u nejavnoj sjednici, održanoj 26.01.2021.godine, donio je

**R J E Š E N J E**

**Žalba se odbacuje kao nedopuštena.**

**O b r a z l o Ź e n j e**

Odlukom Centralne izborne komisije Bosne i Hercegovine, broj i datum navedeni u uvodu, poništeni su izbori održani 15.11.2020.godine na taksativno navedenih 89 redovnih biračkih mjesta u izornoj jedinici Doboju za nivo gradonačelnika Grada Doboja i Skupštinu Grada Doboja, te je odlučeno da će se nakon pravosnažnosti odluke, donijeti odluka o raspisivanju ponovnih izbora.

Ovu odluku pobija Opštinski odbor Doboju političkog subjekta Partija demokratskog progres-PDP sa prijedlogom da se ožalbena odluka ukine ili poništi, naloži Centralnoj izornoj komisiji BiH da upotpuni postupak na način da se Lokalni izbori 2020.godine u Doboju ponište u potpunosti, a ne samo na 89 biračkih mjesta, odnosno da se odlukom obuhvate i 17 redovnih mjesta, 2 mobilna tima, biračko mjesto za glasanje nepotvrđenim glasačkim listićima, glasove pristigle putem pošte i iz inostranstva koji nisu obuhvaćeni pobijanom odlukom.

Centralna izborna komisija Bosne i Hercegovine dostavila je ovom sudu odgovor na žalbu u kojem je istakla da žalba nije dopuštena jer je izjavljena od neovlaštenog lica. Predlažu da se žalba odbaci kao nedopuštena ili odbije uz navođenje razloga neosnovanosti žalbenih navoda.

Žalba nije dopuštena.

Prema odredbi člana 6.2 stav 1 Izbornog zakona (Sl. glasnik BiH 23/01 sa izmjenama) zaštita prava uspostavljenih tim zakonom pripada političkom subjektu u čije ime, shodno članu 6.3 stav 1, prigovor potpisuje predsjednik ili ovlašteni predstavnik političke stranke.

Zakon o upravnom sporu BiH, čije se odredbe primjenjuju u postupku po izbornim žalbama, u članu 80 stav 1 propisuju da žalbu potpisuje predsjednik ili ovlašteni predstavnik političke stranke.

Uputstvo o procedurama za rješavanje o prigovorima i žalbama podnesenim izbornim komisijama (Sl. glasnik BiH br. 25/20) u članu 5 stav 1 propisuje da se potpis ovlaštenih predstavnika mora nalaziti na obrascu deponovanih potpisa za podnošenje prigovora i žalbi koji se predaje nadležnoj izbornoj komisiji.

U konkretnom slučaju žalbu je izjavila organizaciona jedinica političke partije Partija demokratskog progresa-PDP, kojoj prema citiranoj zakonskoj odredbi ne pripada pravo samostalne zaštite povrijeđenog izbornog prava, budući da ta zaštita pripada samo političkom subjektu.

Nadalje, izjavljena žalba se ne može smatrati žalbom političkog subjekta, jer je nije potpisalo lice koje je primjenom zakonskih odredbi ovlašteno za potpisivanje žalbe u ime političkog subjekta, niti potpisnik u skladu sa Uputstvom, ima deponovan potpis da može kao ovlašteni predstavnik političke stranke izjaviti žalbu.

Na osnovu iznesenih utvrđenja apelaciono vijeće zaključilo je da žalba nedopuštena u smislu člana 180 stav 3 Zakona o parničnom postupku pred Sudom BiH (Sl. glasnik BiH br. 36/04 sa izmjenama), te je primjenom člana 191 stav 1 tačka 1 citiranog zakona žalba odbačena, a odredbe kojeg zakona se shodno primjenjuju kako je to propisano članom 60 a) Zakona o upravnim sporovima Bosne i Hercegovine (Sl. glasnik BiH broj 19/02 do 83/08).

PREDSJEDNIK VIJEĆA  
SUDIJA  
Vesna Trifunović